

Was ein Comet sey: wo her er köme / vnd seinen vrsprung habe /

von vndercheidung, vñ in was form vñ gestalt sye erscheynen.


Auch von irer bedeutung / mit anzeygung etlicher historiē /

vnd geschichten / so denen Cometen nach geuolgt /

vnd sonderlich von dem Cometen erschiēen im

Weinmonat des xxxij. jars. Durch Vlicos

laum Prucknerum beschriben.



Ein vorred zu dem Leser.

Es ist gwonlich/ das sich die welt vil
mer von kleinen / doch vngewonten dingen verwundert/ daß
von grossen/so doch täglich beschehen/ Dañ yenyemant wun-
dert der herlich/ vnd gewaltig lauff des himels/ vnd der Son-
nen/ vnd anderer beyder irigen so man Planeten nent/ vnd ves-
sten sternenn/ wunderbarliche bewegung / vergassen etwan an einem fleis-
chen/ vbersehen das groß / welches alles auß vnwissenheit der natürlichen
künsten erwechst/ welche auch zu vnsern zeiten gar nahe alle zu boden ligen
vnd in veracht kommen/ So her wir auch von stund erschrecken/ so etwas
vngewonlichs bey vns sich erhebt/ als do seind Erdbiden/ fliegende fiewr/
Cometen/ vnd dero gleichen mer impressiões/ als sie die Philosophi nen-
nen/ wie dañ setzund vor augen/ vnd zwar wo wir die natürlichen vrsach-
en solcher dinge hetten oder wisten/ wurden wir nit zu gleich klein mütig
sonder getröst vnd gewiß sein/ das es würckungen der natur weren/ wel-
che Gott der herr vns zu vermanen vnd warnen verordnet hette / Darauß
dañ auch volgen wurde/ so wir Gott vor augen hetten/ das wir vns/ wie
dañ der Prophet sagt/ vor den zeichen des hymels/ als die heyden/ nit fürch-
ten dorfften. Es würde auch nit ein jetlicher mit vngewaschen henden dar-
ein rumpeln/ vnd seinen geysser darauß speyen/ vnd nach duncken vnd ge-
rodt wol von solchem schreiben vñ reden/ von welchem er doch keinen büch-
staben nie gelernt hat/ wie dañ zu vnsern zeiten vil practicanten thün. Die
weyl nun (wie gesagt) des verwunders von solchem kein end ist/ will ich
meinem verheysen nach/ von disem vnd andern Cometen etwas schreiben
in solcher gestalt vnd ordnung/ was ein Comet sey/ wo her er kome/ vnd sei-
nen vrsprung habe / von vnderseydung der selbigen / vñnd in was form
vnd weyß sie erscheinen/ auch von irer bedeytung / mit anzeigung etlicher
historien vnd geschichten / so den Cometen gemeinglich nach volgen/ auß
welchen die bedeytung dises gegenwertigens Cometen anzeygt würt.

Was ein Comet sey/ vnd wo her er

erwache/ vnd zu vor etliche beschluß rede/
so in solchen notwendig.

Es spricht Aristoteles am ersten büch Meteororum / das dise vnderste
welldt/ anhengig vnd vnderworffen sey dem lauff der obersten welldt/ also
das alle ire krafft do her geordnet vnd regiert werde / welches auch Proles

mens bezeugt am neüntten wort / do er spricht das in wachfung oder zů nemen / die form vnd gestalt diser vndersten welt / ire anreytzung vñ art von der obersten habe / wie er / sampt denen so darüber schreiben solchs von den imaginibus probiert / vnd die erfarnuß solchs alles beståtigt.

Auß welchem zů dem ersten volgt / das die hymnischen cörper ire würckung haben in die Element / vnd solchs in zweyerley weyß in enderung vnd abnemen / in werden oder zů nemen / daß so die Son vnd andere Planeten am höchsten puncte Zenith genant / einer region oder lands kōmen / so werden die obersten Elementen / als do seind das fēwer / vnd der lufft gemert / das wasser vnd erdtreich gemindert / vñ also widerumb in abwesen der Sonnen vnd anderer sternē werden die vndersten gemert / vnd die obersten gemindert / so sich daß die Element in sich selbs eins in das ander ver wandelt / als man täglich sieht vnd entpfindt.

Zum andern / haben auch die obersten cörper krafft vñ würckung in die vndersten / also / das sye auch bewegung vñ enderung / der statt nach zů rechnen / bringen / Dann je das oberst theyl des luffts würt bewegt gerings weyß herumb / nach dem lauff des hymels / welches dann die Cometen außgenscheinlich bewerē.

Zum dritten / so haben die Planeten ire würckung vñ krafft nit allein vber die Element / sonder auch vber die Cörper / die des halben vñ uolkommen heysen vnd seind / das sie nit bestendig / vnd allwegen bleiben / sonder widerum vergeen / Dañ die matery solcher ingression / als do ist d dampff / vñ rauch vom erdtreich / würt nit vffgezogē / daß durch vorhin eingeleytē hitz vnd krafft eins gestirns / wie wir daß sehen in den Cometen / welche nit allein des hymels lauff volgen / sonder auch dem Planeten nach / durch welchen sie worden seind / bewegt werden / So her daß etwa kōmpt so mancherley enderung / vñ kērung der Cometen / do her auch kundt würt vñ offenbar / das die Planeten ja jetlicher in sonderheyt sein krafft vnd würckung haben / ob schon vil darwider reden.

Zum vierden haben auch die stern ire würckung vnd krafft / vber vnd in Cörper so auch das leben haben / mixta genant / daß je ire qualiteten vñ complexion durch iren lauff geendert werdē / von einer in die andern / von hitze in kēlte / von trückne in feuchtigkeyt / vnd widerumb / welches alles clar vñ offenbar erscheint / vñ nyemant verborgen / daß dem / der es nit wissen will.

Auß welchem allem beschlossen würt / das alle solche feürige impressiōnes / so im lufft oder sunst geschehen / natürlich kōmen vñ erscheinen / so daß auch ir vrsachen durch welche sie kōmen / natürlich seind / welches auch von Cometen verstanden würt . So her nun kundt würt / was ein Comet sey / von welchem nun volgt.

Es haben sich der alten vil bemühet vnd bekümmert/ wie sye sy vnwissenheit verthädigen möchten/ Die weyl die Egyptier (von welchen am meysten der lauff des hymels vn gestirns erfunden ist) von den Cometen nichts oder gar wenig geschriben haben/ so daß in irem land solche nit kömen/ oder selten gesehen werden/ die weyl ein stäter clarer hymel vn lufft bey ihnen ist/ vnd haben also mancherley meynung vnnnd opinionen auffbracht/ welcher doch keyne die prob halten mag. Anaxagoras vnd Democritus hielten/ ein Comet were ein versamlung viler irziger sternen/ vnnnd so aber deren nit so vil/ vnd alwegen vnder dem Zodiaco gangent/ Die Cometen aber außert halbs vil mals erfunden werden/ felt solche opinion gleich zü boden/ Die Pythagorici sagten/ es wer ein Planet/ der etwa lang vnder den streymen der Sonnen gestanden/ vnnnd also darnach erschine/ Auß welchem volgen müste das Venus vnd Mercurius am meysten Cometen wurden/ so dann nit weyt von der Sonnen gangen/ vnd besonder Mercurius/ welches auch wie das vorzüg sich selbs bezeugt/ das es nit halten mag.

Hippocrates meynet/ es wer wol ein planet/ dem corpus nach/ auch der materi des hymels/ aber des schwantzes halben/ wer er von der natur der Elementen. Obetten die treffenliche geleerte menner den lauff des hymels vnd gestirns nur ein wenig gewist vnd erkennt/ hetten sie gewißlich nit so kindisch/ ja so nerzisch geirret/ widerlegung solcher opinion ist nit not/ so dz widertheyl offenbar ist/ vnd solchs villeicht dem leser auch verdrießlich sein möchte. Aristoteles aber am ersten Meteororū spricht/ das ein Comet nichts anders sey/ daß ein feister dampff/ oder dunst/ der von feisten/ schleimerigen örten vnd gründen/ von der Sonnen vnd andern sternen vffgezogen werde/ vnd so solcher dampff groß/ vnnnd von der kelte im lufft nit zü ruck/ (wie den andern/ so minder vn kleiner seind) geschlagen wird/ sonder hindurch dringt/ vnd in das oberst theyl des luffts kompt/ wird solche materi entzündt/ vnd weret also/ vnd bleibt nach der menge vn größe der materi/ biß sie verzert würt/ vnd also (wie obgesagt) mit dem obersten theyl des luffts/ nach dem lauff des hymels herum gefürt/ Es begibt sich auch das etwan der Comet züm ersten klein erscheint/ vnd von tag zü tag wechset vnd zünimpt/ vnd größer würt/ auß vorgesagter vsach/ das die dampff je lenger je mer vom gestirn vffgezogen werden/ durch welches er dest lenger verharren mag. Auß welchem erlernt würt/ was ein Comet sey/ vnnnd wo her er kompt vnd entspringt.

Von vnderscheydung der Cometen.

So wir nun wissen was/ vnd von wannen ein Comet sey/ würt notwendig das wir auch ire vnderscheid wissen/ so daß sie etwa anders vn anders erscheinen/ etlich seind klein/ etlich groß/ etlich mit einem langen schwantz/ etlich mit einem kurtzen/ etlich aber on solche schwantz/ sonder ire streym

seind ringsweyß vmb das corpus / welches alles nach art vnd geschicklich-
keyt der materi her kompt. Es beschreiben die Astronomi neuerley Come-
ten / nach der siblen planeten / vnd des tracken haupts vnd schwanzes erhö-
hung. In der erhöhüg Saturni würt ein Comet nit sonderlich groß / würt
Nigra oder Niger genent. In des Juppiters erhöhung kompt ein vffrech-
ter Comet / welcher auch darumb Columna genent würt. In Martis erhö-
hung würt ein kleiner roter Comet / welches schwantz sich vbersich stelt / vn-
als etlich meinen / sey es der / den Ptolomeus vnnnd Bali Matutinam / oder
Aurozam nennen. In der erhöhung der Sonnen erscheint ein Comet gold-
farber gestalt / welcher auch sunst Rosa genent würt / erscheint auch gemein-
lich on ein schwantz. Aber in Veneris erhöhung kompt ein hübscher lusti-
ger vnd grosser Comet / welcher Miles heist. In der erhöhung Mercurij /
begibt sich ein Comet der nit sonderlich groß vom corpus / aber doch schein-
bar vnd clar ist / eins langen schwanzes / welcher auch Ascon / od dominus
Ascone genent würt. Welcher gestalt vnd form ich auch disen / als vil ich in
gesehen vnd geachtet / geurtheylt hab. In der erhöhung des Monsersch-
eint auch ein grosser heller Comet / doch weyß farb / vnnnd würt gemeinlich
Argentum genant. So werden auch (wie die Astronomi wöllen) in drack-
en haupt vn schwantz zwen Cometen / etwan als lang rütē / doch im haupt
erwas dickers / welcher auch Pertica / im schwantz dinner / darumb er Ves-
tu genant würt. Es werden auch gemeinlich vil vnd mancherley entzün-
dung gesehen / nemlich / so ein Comet erscheinen will / vnnnd auch so er stat /
wie dan auch zu diser zeyt beschehen / aber solchs / die weyles nit hinauff in
die oberste des luffts gezogen werden mag / verzert es sich gar bald vnnnd
verschwindt.

Was durch die Cometen / so sye erscheynen
bedeutet / vnd angezeygt werde.

Das das gestirn / vnd der lauff des hymels etwas bedeüte / vnnnd durch
solchs etwas künfftig sey / haltet nit allein die Philosophhey / das ist die na-
türlich kunst / sonder die geschriff bezeugt es auch / dan je das gestirn ist nit
all in zu vndercheiden die zeyt / wie etlich wöllen / sonder auch zu zeichen ge-
ben / wie wir lesen Gen. i. So es nun zeichen seind / so bedeüten sie ja etwas.
Nun hat vns Gott mancherhand gewarnt vnd vermant / durch sein wort /
fürnemlich / vnd so das nit geholffen / mit vffrür / theürung / sterben / pesti-
lentz / helt nun auch an solchs durch die natur / dar mit er je nichts vnderlaß
vns zu im zu ziehen / welchs dan auch ein sondere gnad vnd güthat ist / dan
das erdtreich bewegt sich / die sonn verleürt iren schein / es werden gesehen
mancherley zeichen am hymel / es kömen Cometen / es ist warlich zu besor-
gen wo wir Gott nit vor augen haben / das auch bald die stein werden an-
fahen zu schreyē / dar mit das Gottes zorn vber vns gehauffet werde / Wir

haben im vergangen jar auch ein Cometen gesehen / welcher der Sonnen
 nach gieng / in disem sehen wir ein andern vor der Sonnen auffsteigen / zu
 dem ist ein finsternuß der Sonnen gewesen am xxx. tag Augusti / vnd seind
 im selbigen monat zwen Erdbidem auch geschehen / wie wol nit zu groß /
 Der erst am eylfften tag Augusti / zwischen zehen vñ eylffen im tag / do dan
 der mon in die opposition Saturni ist gangen / Der ander am sybenzehen-
 den tag Augusti / frū vmb die viere vor tag / do der mon kam von der oppo-
 sition Martis / welches alles innerthalben zwentzig tagē beschehen ist. Vff
 solchs im folgenden monat kompt der Comet / vnd sampt den coniunctio-
 nibus vñ aspecten der planeten / versiglet er das vordrig alles. Meinstu nit
 lieber leser / ob solchs nit auch zeichen seind / gang hinder sich in die historien
 vnd such mir ein gleichezeit / nemlich zwen Cometen / zwen erdbidem / ein
 finsternuß der Sonnen in einer so kurtzen zeit / ich geschweig anderer im-
 pression / so auch gesehen / gerade vor dem jetzund erscheinenden Cometen /
 vnd so die Cometen nit vergeben können / wellen wir in kurtz sehen sein be-
 deutung. Als ich disen Cometen gesehe / hab ich in geachtet in der exaltati-
 on Mercurij / im zeichen der Junckfrawen / vnd darumb dominū Ascone
 genant (dan miles etwas grösser vñ heller erscheint / nach meinem bedunck-
 en) von der art vnd complexion Mercurij / so er doch auch seinem lauff am
 meysten volgt / welcher zum fürnemstē / als auch die Philosophi sampt den
 Astrologis sagen / bedeüt den todteins großmichtigen / vnd sonderlich so
 dem zeichē vnderworffen / oder darunder geboren seind. Auch denen / so len-
 der / gegent / vñ Stett vnder der Junckfrawen gelegen / regirn / wölchs der
 Reinsfram / Erschlandt / Bernten / Steyer wol erfahren werden / vnd in son-
 derheyt so gegen mittag seindt / Seind auch gewarnt alle Kunstreiche Mer-
 curij kinder genant / dan es abermal vber die arm kunst gehn würt. Es sol-
 len sich auch fürsehen die Kauffleüt / das sie nit schaden entpfahen / dan es
 spricht Albumasar im buch von den grossen coniunctionibus / das so ein Co-
 met im zeichen der Junckfrawen erscheine / das er bedeut grossen betrug /
 wenig gerechtigkeit in kauffen vnd verkauffen / schaden nit allein der güt-
 ter / sonder auch des leybs / die menschen werden fallen in schwere grosse
 krankheyt / zittern vñ bidmen / scharpffe hitzige Pestilenzische fieber / selts-
 ame eyssen vnd geschwär. Es würt auch den weybern getrewt / geferlickeyt
 in der geburt / vnd so er in einem trucknen zeichen stat / bedeüt er von seiner
 natur auch truckne vñ ein dürrezeit / so dan die dünst vñ nebel / so von dem
 gestirn vffgezogen / feist vñ schleimerig / nit resoluiert mügen werdē / sonder
 also verbrennen / vñ wo nit dz künfftig jar Saturnū zu einem herren hette /
 welcher feichtheit auß seiner / vñ des zeichē in welchē er gat / art vñ eygen-
 schafft zu zeiten bewegen wurde / wer zu besorgen ein hitzig truckne vñ gift-
 tig jar / doch krankheyt halben würt Saturnus wenig helfen / Es wurd

auch kein wunder sein / das noch mer Erdtbiden hernach kotten / die weyl
 er in einem irdischen zeichen ist / vnd der zeyt art vñ einfluß solchs erheischt.
 So wird auch vergiftung des lufftis zu besorgen / so dan nit dem Come-
 ten allein / sonder auch den Erdtbiden nach volgen / darauff dan pestilentz
 vñ sterben kotten / dan Ptolomeus am letsten sententz seiner hundert wort
 spricht / das so ein Comet im fallenden hauß / das ist im zwölfften gesehen
 werde / das er bedeüt ein schnellen todt. Ich weyß wol dz auch die wüthzer
 ein aug vff disen Cometen werffen / vermeinen er werde widerumb grosse
 theürung bringen / dar mit sie abermals den Juden spies brauchen möch-
 ten / so doch das widerspiel sein wird / dan die Cometen bedeüten nit all vn
 fruchtbarkeit des erdtreichs / Es ist nit der Comet / der Nigier od Nigra ge-
 nent würt / welcher von der natur Saturni ist / solche als auch der jetzige /
 vnd der im vergangen jar / zeigen an gute fruchtbare jar / wie wir dz schein-
 barlichen gesehen haben. Solchs hab ich den wücherern / vff das sie sich nit
 zu vil frewen anderer leüt vnglück / vnd die freüd inen nit dz hertz abstosse /
 gütermeinung nit verhalten wellen. So werden auch getrewt durch disen
 Cometen vffrür / krieg / vnd blüt vergiessen / dan gemeinglich solchs auch
 hernach volgt / wie wir auch vergangens vnd gegenwertigs jars wol ge-
 sehen haben / vnd so er im vffgang vor der sonnen erscheint / wird zu besor-
 gen ein schnelle würckung / vñ so er vom nidergang gegen der sonnen / wie
 dan alle planeten / bewegt würt / vñnd sich aber gegen mitternacht zeucht /
 vñ sein lauff nit als wanckelbar ist als des vordrigen / sonder etwas stiller /
 wird zu besorgen das wir den feind zu dem frembden auch im hauß habē.
 Seind fürsichtig die fürgesetzten / vff das mütwillig volck sich nit erreg zu
 einer entpörung vnd vffrür / so er dan auch dem zeichen der Visch / in welch
 em die groß coniunction gewesen / entgegen stet / vnd aber das zeichen der
 Junckfrawen vns betrifft / darumb es dan not sein würt vffsehens / dann
 so wir eygentlich besehen die historien vñ geschichten / finden wir allwegen
 das etwas mercklichs hernach ist kotten / Ich will geschweygen des groß-
 sen Cometen zu der zeyt Demetrii / von welchem auch Seneca schreibt / vñ
 von dem das genolgt hat / als von dingen so lengest geschehen / Auch von
 dem / da Hegesippus von sagt im fünfften buch / von der zerstörung Hie-
 rusalem am lxiij. capitel / sonder von denen / so in kurtz verruckten zeiten
 von historiographis verfaßt seind. Im jar von Christi geburt drey hundert
 vierzig / stund ein Comet / vnd starb gleich darauff der Keyser Constanti-
 nus / der groß genant / volgt vil vbel / erwechst die schedlich / grewlich ketz-
 erey der Arianer / es kriegen die zwen sün Constantini mit einander / ward
 der ein erschlagen / Die Persier verwüsten Mesopotamiam / grosse krieg
 wider Franckreich / vil stett seind verfallen vom Erdtbiden / welches alles
 dem Cometen genolgt hat.

Item im jar vier hundert achtzehen / ist gewesen ein finsterniß der Sonnen / vñ ein Comet im Augstmonat / vñ gewert biß in Herbstmonat. Was diser vnd volgenderzeyt die Gotthi thün / vñnd erlitten haben / in Italia / Franckreich / Hispania / des gleichen in ir schiffung / beschreibet vnder ander auch Orosius. Item im jar vier hundert drey vnd fünfzig / ward der hymel als ein sewer / worden gesehen mancherley zeichen am hymel / item erd bidem / ein finsterniß des Mons / erscheint ein Comet / ein bach in Franckreich fließt mit blüt / volgt die groß zerrüttung vñnd schleiffung Europe / vom wütrich Attila dem König der Hünen / Im andern jar darnach starb Attila / Aetius der treffentlich Radtherz / vñnd streitbar man / nemlich wider Attilam / ward vom Valentiniano dem Keyser auß neyd getödtet. Valentinianus von den seinen zu Rom erwürget / kómen die Vandali / vberfallen Rom / vñ plündern vñ verderbens. Item fünff hundert vier vñd neünzig ward ein Comet ein monats lang gesehen / des gleichen vil andere zeichen / Welchem nach genolgt hat / der teüflisch verfürisch Machumet / welcher sich für den grossen Propheten Gottes herfür gethan hat / vñ also den Saracenern ein gesatz geben / auß welchem der groß jamer ist kómen / der thürkisch glaub / was der selbig biß hie her gebracht / vñd vnglücks darauß genolgt / ist leyder nur zu offenbar. Item syben hundert neün vñd zweynzig erschienen zween Cometen im Jenner / einer gieng der Sonnen vor / der ander nach / starb Gregorius der ander des namens Papst zu Rom / Liutprandus König in Lombardey belegert Rom / Der König auß Franckreich zeücht in Italiam / volgt ein grosse Pestilenz / also das zu Constantinopel vff drey mal hundert tausent menschen sturben. Im anderen jar nach den zweyen Cometen / seind die Saracener mit iung vñd alt in Galliam zogen in meynung das selbig einzunehmen / vñd darinnen zu wonen / Aber Karolus begegnet inen / vñd erschlug der Saracener sampt irem König Abdiram / drey mal hundert vñnd achtzig tausent. Item acht hundert fünfzehen erschein ein erschöcklicher Comet / volgen grosse Erdbidem in Grecia / do auch vil volcks sampt dem gebew verfallen ist. Es ist auch des selbigē jars der Reiu in teütschen landen vast groß worden / vñd also von wegen seines außlauffens / grossen schaden gethon. Item acht hundert acht vñd dreissig ist erschienen ein grosser Comet / ist bald darnach Keyser Ludwig gestorben. Item neün hundert vier vñd vierzig / ist erschienen ein grosser Comet / volgt ein grosser grausamer hunger. Item im jar tausent ist gewesen ein Comet / auch ein grosser Erdbidem / ist Keyser Ottho gen Rom zogen / vñd Crescentem Patricium / der mit gewalt regieren wolt / vberwunden / vñd erschlagen / hernach starb der Papst Johannes / volgendes jars ist dem Keyser Ottho in dem welsch land vergebē worden. Item es seind nach solchem allem

solche thewung nach geuolgt vnd pestilentz koften / schier in der ganzen welt / das man die menschen / so noch halb lebendig / von forcht vnd hungers wegen / mit sampt den todten hinein geworffen / vnd vergraben hat. In welchem jar auch widerumb ein Comet erschein / Keyser Henrich fñrt grosse krieg in Germania / Bohemia / Italia / Apulia. Item tausent sechs vnd sechzig / als Ottho Frisingesis schreibt / ist ein Comet erschinen / welchem / wie er sagt / die wirckung nach hat genolgt / Dann das selbig jar hat Guilielmus / ein Graff in Nordmanien / Engelland vberzogen / vñ als er den kñig vmb bracht / bestritten. Nach welchem ein solcher grosser hunger entstanden / das die leüt einander (wie die historien sagen) gessen haben / Was auch der Papst mit Henrico dem Keyser gehandelt habe / ist auß andern offenbar. Item tausent syben vnd neüntzig ist auch ein Comet erschinen gegen nidergang der Sonnen des gleichen andere zeichen / ist Hierusalem gewonnen von den vnsern / Auch bey der stat Nicea / die Sarzacener durch zwey grosse schlachtē ernider gelegt. Item tausent zwey hundert vier vnd sechzig ist gestanden ein vngewöñlicher grosser Comet / vff drey monat / vñ die nacht do Urbanus der Papst starb / ister auch erloschen. In Syria bestreiter der Soldan die Christen / darnach in Armenia des gleichen. Item tausent drey hundert vnd eins / do dan auch Orbis magnus inn das zeichen des Lewens kam / ist erschinen ein Comet / erhebt sich in Flandern ein bawren krieg / welche von irem herren abfielen / vnd erschlugen im vil volcks grausamgklich / das Türckisch reich / hat sich diser zeyt recht eingesetzt / Der kñig Philips auß Frankreich verhofft durch Scartam Columensem / dz der Papst Bonifacius 8 acht des namens gefangen ward / seind zu Rom groß vffrur gewesen / Die Franzosen seind darnach wider in Flandern zogen / hat genolgt groß blüt vergiessen. Item tausent drey hundert vier zehen / hat gewert ein Comet drey monat lang / do erhüb sich der krieg zwischen dem Keyser Ludwigen auß Beyern / wider hertzogen Fridrichen von Osterreich / welcher vom Keyser gefangen vnd getödt ward. Es erhüb sich auch grosse zwittracht zwischen dem Keyser vñ dem Papst. Item tausent drey hundert vñ vierzig / ist gestanden ein Comet / hat sich erhaben der krieg zwischen den Franzosen vnd Engellender / vñ worden vff zehen tausent Franzosen erschlagē / hat auch hernach geuolgt ein grosse pestilentz in Italia / das zu Florentz allein vff xvi. tausent menschen gestorben seind. Item tausent drey hundert zwey vnd fünffzig / ist erschinen ein Comet inn Christmonat gegen mitternacht / welchem grosse wind / vñ andere feürige zeichen im lufft geuolgt haben / Es seind auch diser zeyt etliche secten vffgestanden / Nach solchen zeichen / ist ein vnzelicher hauff der bewschrecken in Affrica vnd Cipern gesehen / welcher auch grossen schaden an wachsenden

früchten gethon hat. Item tausent vier hundred vnd zwey / ist auch ein Comet am hymel gesehen / nach welchem der groß wütrich vnd tyrann / 8 sich auch den zorn Gottes nenn / gestorben / vnd sich das Türckisch reich durch Amiraten widerumb erhebt. Item tausent vier hundred vnd acht / Kompt widerumb ein Comet / volgent grosse schlachten vnnnd blüt vergiessen / hin vnd wider in Europa / Es ligen darnider die teütschen herren in Preußen / ward ein groß volck vff beidenseyten erschlagen. Item tausent vier hundred syben vnnnd fünffzig / ist erschinnen ein Comet / welcher niger genant würt / volgt ein langwirig Pestilentz / stunden vff die Michels brüder / Kommen Erdbidem / do in Neapoli vff die viertzig tausent verfallē / Der Türck Mahumet / so vor Constantinopel her gewinnen / hat diser zeyt das ganz Corinthum / vnd Peloponnesum vnder sich bracht / auch Bosnan / vnd ander umbligende reich. Es ist noch in menschen gedechtnüß / was der Comet im tausent vier hundred zwey vnd sybenzig erschinnen / bracht hat / Erfort verbran / Kompt der heysßz somer / erhebt sich der Burgundisch krieg / es geschehen vil schlachten / biß zu letzt auch der Hertzog erschlagen ward. Item tausent fünff hundred vnnnd sechs / ward gesehen ein Comet / volgt der tod des könig Philips. Item im vergangnen jar / tausent fünff hundred ein vñ dreyszig / volget vff dem Cometen die vneinigkeyt inn der Eydnoschafft. Item die groß rüstung vnnnd zug des ganzen Teütschen lands wider den Türcken / vnd des Türcken wider vns. Also seind wir gewißlich warten auch etwas / wie dan vor hin angezeigt ist / Gott der herr aller ding wölle vns gnediglich bewaren vor allem vbel / Amen. Also lieber leser / hab ich in kurtz vnd eyl / vff viler bitt vñ ansuchen ein wenig geschriben von disem vñ anderen Cometen / Wölst solch meinen dienst zum besten keren / vnd vffnehmen / dan es jegüter meynung beschehen ist.

Getruckt zu Straßburg durch Johannem Albrecht /
im jar M. D. XXXij.